



Den kuadro di kontinuashon di restrukturashon

Bon kontrolá Girobank lo terminá su aktividatnan bankario na Boneiru

KRALENDIJK/WILLEMSTAD – For di yanüari e aña aki a kuminsá ehekutá un plan di restrukturashon na Girobank N.V. Den e kuadro aki a disidí awor pa gradualmente i bon kontrolá terminá e aktividatnan bankario na Boneiru.

For di momento ku korte na desèmber 2013 a dikta un areglo di emergensia pa Girobank, apoderadonan na nòmber di Banko Sentral di Kòrsou i St. Maarten (CBCS) ta forma e gerensia i ta efektuá supervishon. Despues ku a intensifiká e prosedimentunan interno a wak tur gastu i entrada tur kaminda minusiosamente. Ademas a evaluá tur aktividat riba nan balor stratégiko pa Girobank. Mientrastantu e aktividatnan normal di banko mester kontinuá na un manera responsabel na benefisio di e klientenan grandi i chikí.

Sukursalnan a sera

Komo parti di e plan di restrukturashon ya anteriormente a tuma medida; por ehèmpel a sera dos sukursal na Kòrsou. Den e mesun kuadro a disidí awor pa mengua e aktividatnan bankario na Boneiru, pasobra pa Girobank esei no tin balor stratégiko mas. Djaweps atardi gerensia di Girobank a informá e personal na Boneiru tokante e motibunanan ku a kondusí na seramentu di e banko su estableimentu na Boneiru. Girobank ta opta pa no sigui hasi uso mas di e pèrmit di De Nederlandsche Bank (banko sentral di Hulanda) pa funshoná komo banko na Boneiru.

Atministrashon

Den un karta i/òf den kontakto personal lo pone esnan ku kuenta na banko, esnan ku tin depósito i e kreditoranan na altura di un ke otro. For di e ofisina na Kòrsou lo manda refuerso pa asistí e empleadonan Boneriano pa atendé e klientenan ku nan asuntunan bankario. E atministrashon di asuntu bankario, manera hipotek i kréditonan, lo sigui for di Kòrsou, a menos ku e klientenan individual ta preferá algu otro. Den e tempu binidero e klientenan por traspasá nan plaka pa otro banko òf lanta loke nan tin na Girobank. Te na e traspaso e klientenan por sigui hasi uso normalmente di nan kuentanan di pago.